

# पतरस की पहल्ली चिट्ठी

**1** पतरस की ओड़ तै, जो यीशु मसीह का प्रेरित सै: पणमेसर के उन छांटे होए लोगां के नाम जो पुन्तुस, गलातिया, कप्पदुकिया, एशिया अर बिथुनिया के क्षेत्रां म्ह सारै किते फैले होए सैं। **2**थम, जिन ताहीं परम पिता पणमेसर के पहल्ले ज्ञान कै मुताबिक छांटया गया सै, जो आपणी आत्मा के काम कै जरिये उस ताहीं समर्पित होवै, जिन ताहीं उसके आज्ञाकारी होण कै खात्तर अर जिन पै यीशु मसीह के लहू के छिडकाव के पवित्र करे जाण कै खात्तर छांटया गया सै।

थारै पै पणमेसर का अनुग्रह अर शान्ति भोत घणे तै होंदे रहवैं।

## जिन्दी आस

**3**म्हारे प्रभु यीशु मसीह का परम पिता पणमेसर धन्य हो। मरे होया म्ह तै यीशु मसीह के पुनरुत्थान कै जरिये उसकी अपार करुणा म्ह एक जिन्दी आस पा लेण कै खात्तर उसनै म्हारै ताहीं नया जन्म दिया सै। **4**ताके थम थारै खात्तर सुर्ग म्ह सुरक्षित रूप तै धरे होए अजर-अमर बेकसूर नास ना होण आळा वारिसपणे नै पा ल्यो।

**5**जो बिश्वास तै सुरक्षित सै, उन ताहीं ओ उद्धार जो बख्त के आखरले कुणे पै प्रगट होण नै सै, मिलै। **6**इस पै थम भोत खुश सो। हालाके इब थारै ताहीं थोड़े बख्त कै खात्तर कई तरियां की परीक्षायां म्ह पड़कै दुखी होणा भोत जरूरी सै। **7**ताके थारा परखया होड़ बिश्वास जो आग म्ह परखे होए सोन्ने तै भी घणा कीमती सै, उस ताहीं जब यीशु मसीह प्रगट होवैगा फेर पणमेसर तै बड़ाई, महिमा अर आदर मिलै।

**8**हालाके थमनै उस ताहीं देख्या नीं सै, फेर भी थम उस ताहीं प्रेम करो सो। हालाके थम इब्बे उस ताहीं देख कोनी पा रहे सो, किन्तु फेर भी उसम्ह बिश्वास राक्खो सो अर एक इसे आनन्द तै भरे होए सो जो कह्या नीं जा सकदा अर महिमा आळा सै। **9**अर थम अपने बिश्वास के नतीज्जे कै रूप म्ह आपणी आत्मा का उद्धार करण लागरे सो।

**10**इस उद्धार कै बाबत म्ह उन नबियाँ नै, बड्डी मेहनत कै

गेल्या खोजबीन करी सै अर बड्डी चौकसी कै गेल्या बेरा लाया सै, जिन्ने थारै पै प्रगट होण आळे अनुग्रह कै सम्बन्ध म्ह भविष्यबाणी कर दी थी। **11**उन नबियाँ नै मसीह की आत्मा तै न्यू जाणया जो मसीह पै होण आळे दुखाँ ताहीं बताण लागरी थी, अर वा महिमा जो इन दुखाँ कै बाद प्रगट होवैगी। या आत्मा उन ताहीं बताण लागरी थी। ये बात इस दुनिया पै कद होवैगी अर फेर इस दुनिया का के होगा।

**12**उन ताहीं न्यू दिखा दिया गया था के उन बात्तां का उपदेश करदे होए वे खुद आपणी सेवा कोनी करण लागरे थे बल्के थारी करण लागरे थे। वे बात सुर्ग तै भेज्जे गये पवित्र आत्मा कै जरिये थारै ताहीं सुसमाचार का उपदेश देण आळयां कै जरिये तै बता दी गयी थीं। अर उन बात्तां ताहीं जानण कै खात्तर तो सुर्गदुत लग तरसै सैं।

## पवित्र जीवन कै खात्तर बुलावा

**13**इस करके मानसिक रूप तै चौकन्ने रहो अर अपने पै काबू राक्खो। उस बरदान पै पूरी आस राक्खो जो यीशु मसीह कै प्रगट होण पै थारै ताहीं दिया जाण नै सै। **14**आज्ञा मानण आळे बाळकां कै तरियां उस बख्त की भूंडी इच्छायां कै मुताबिक अपने ताहीं मतना ढाळो जो थारै म्ह पहल्ले थी, जब थम अज्ञानी थे। **15**बल्के जिस तरियां थारै ताहीं बुलाण आळा पणमेसर पवित्र सै, उससे तरियां ए थम भी अपने हरेक काम म्ह पवित्र बणो। **16**शास्त्र भी इस तरियां ए कहवै सै: “पवित्र बणो, क्यूँके मैं पवित्र सूं।”

**17**अर जै थम, हरेक के कर्मां कै मुताबिक बिना दुबात के न्याय करण आळे पणमेसर ताहीं ‘हे पिता’ कह कै पुकारो सो तो इस परदेसी धरती पै अपने बसणै आळे बख्त म्ह आदर तै भरे भय कै गेल्या जीवन जिओ। **18**थमनै न्यू बेरा सै के चाँदी या सोन्ने जीसी चिज्जां तै थारै ताहीं उस बेकार जिन्दगी तै छुटकारा कोनी मिल सकदा, जो थारै ताहीं थारे बुजुर्गा तै मिल्या सै। **19**बल्के ओ तो थारै ताहीं बेकसूर अर बिना कलंक आळे मेमने कै समान मसीह के कीमती लहू तै ए मिल सकै सै। **20**इस जगत की सृष्टि तै पहल्ल्या ए उस ताहीं छांट लिया

गया था किन्तु थम लोग्गों के खात्तर उस ताहीं इन आखरले दिनां म्ह प्रगट करया गया। **21** उस मसीह के कारण ए थम उस पणमेसर म्ह बिश्वास करदे रहे जिसनै उस ताहीं मरे होया म्ह तै दुबारै जिन्दा कर दिया अर उस ताहीं महिमा दी। इस ढाळ थारी आस अर थारा बिश्वास पणमेसर म्ह स्थिर हो।

**22** इब देकखो जिब थमनै सत्य का पालन करदे होए, साच्चे भाईचारे के प्रेम ताहीं दिखाण के खात्तर अपणे आत्मा ताहीं पवित्र कर लिया सै तो पवित्र मन तै तगाज्जे के गेल्या आप्पस म्ह प्रेम करण नै आपणा मकसद बणा ल्यो। **23** थमनै नास होण आळा बीज तै दुबारा जीवन कोनी मिल्या सै बल्के यो उस बीज का नतीज्जा सै जो अमर सै। थारा दुबारा जन्म पणमेसर के उस सुथरे संदेस तै होया सै जो जिन्दा अर अटल सै। **24** क्यूँके शास्त्र कहवै सै:

“सारे प्राणी घास की तरियां सैं, अर उनकी सज-धज जंगळी फूल की तरियां सैं। घास मर जावै सै अर फूल पड़ जावै सैं।

**25** किन्तु प्रभु का सुसमाचार सदा-सारीहाण टिक्या रहवै सै।”

यशायाह 40:6-8

अर यो ओए सुसमाचार सै जिसका थारै ताहीं उपदेश दिया गया सै।

### जिन्दा पत्थर अर पवित्र प्रजा

**1** इस करके सारी बुराईयां, छल-कपट, पाखण्ड तथा बैर-बिरोधां अर आप्पस म्ह दोष लगाण तै बचे रहो।

**2** नये पैदा होए बाळकां की ढाळ शुद्ध आध्यात्मिक दूध के खात्तर लालसा करो ताके उसतै थारी बढ़ोत्तरी अर उद्धार हो। **3** इब देकखो, थमनै तो प्रभु के अनुग्रह का सुवाद ले ए लिया सै।

**4** यीशु मसीह के लवै आओ। ओ जिन्दा पत्थर सै। उस ताहीं संसारी लोग्गों नै नकार दिया था किन्तु जो पणमेसर के खात्तर कीमती सै अर जो उसके जरिये छांटया गया सै। **5** थम भी जिन्दे पत्थरां की तरियां एक आध्यात्मिक मन्दर के रूप म्ह बणाए जाण लागरे सो ताके एक इसे पवित्र याजक मण्डल के रूप म्ह सेवा कर सको जिसका फर्ज इसे आध्यात्मिक

बलिदान चढाणा सै जो यीशु मसीह के जरिये पणमेसर अपणान्दा हों। **6** शास्त्र म्ह लिख्या सै:

“देकखो, मैं सिध्योन् म्ह एक कुणे का पत्थर धरण लागरया सूं, जो कीमती सै अर छांटया होया सै इस पै कोए भी बिश्वास करैगा, उस ताहीं कहे भी कोनी सरमाणा पड़ैगा।”

यशायाह 28:16

**7** थम बिश्वासियाँ के खात्तर कीमती सै किन्तु जो बिश्वास कोनी करै सैं उनके खात्तर:

“ओए पत्थर जिस ताहीं शिल्पियाँ नै नकारया था, सारया तै जरूरी कुणे का पत्थर बण गया।”

भजन संहिता 118:22

**8** तथा ओ बण गया:

“एक इसा पत्थर जिसतै लोग्गों ताहीं ठेस लागै अर इसी एक चट्टान जिस तै लोग्गों ताहीं ठोकर लागै।”

यशायाह 8:14

लोग ठोकर खावै सैं क्यूँके वे पणमेसर के बचन का पालन कोनी करदे अर बस योए उनके खात्तर ठहराया गया सै।

**9** किन्तु थम तो छाँटे होए लोग सो याजकां का एक राज्य, एक पवित्र प्रजा एक इसा माणस का टोळ जो पणमेसर का आपणा सै, ताके थम पणमेसर के अनोक्खे काम्मां की घोषणा कर सको। ओ पणमेसर जिसनै थारै ताहीं अँधेरे तै अनोक्खे चाँदणे म्ह बुलाया।

**10** एक बख्त था जिब थम प्रजा कोनी थे किन्तु इब थम पणमेसर की प्रजा सो। एक बख्त था जिब थम दया के पात्र कोनी थे किन्तु इब थारै पै पणमेसर नै दया दिखायी सै।

### पणमेसर के खात्तर जीओ

**11** हे प्यारे ढब्बीयों, मैं थारै तै, जो इस संसार म्ह अणजाणां के रूप म्ह सो, निवेदन करूँ सूं के उन देही आळी इच्छायां तै दूर रहो जो थारी आत्मा तै जूझी रहवै सैं। **12** विधर्मियाँ के

बिच्चाळै आपणा बिवार इतना उत्तम बणाए राख्खो के चाहे वे अपराधियाँ के रूप म्ह थारी बुराई करै किन्तु थारे उत्तम काम्मां के नतीज्जे के रूप म्ह पणमेसर के आण के दिन वे पणमेसर की महिमा प्रदान करै।

### अधिकारी की आज्ञा मान्नु

**13**प्रभु के खात्तर हरेक माणस अधिकारी के अधीन रहो। **14**राजा के अधीन रहो। ओ सारया तै ऊँच्चा अधिकारी सै। शास्कां के अधीन रहो। उन तारीं उसनै कुकर्मियां तारीं दण्ड देण अर उत्तम कर्म करण आळ्यां की बड़ाई के खात्तर भेज्या सै। **15**क्यूँके पणमेसर की याए इच्छा सै के थम अपने उत्तम काम्मां तै बेअक्ले लोगां की अज्ञान तै भरी बात्तां नै चुप करा द्यो। **16**अजाद माणस की तरियां जिओ किन्तु उस अजादी नै बुराई के खात्तर आड़ मतना बनण द्यो। पणमेसर के सेवकां के तरियां जीओ। **17**सारया का आदर करो। अपने धर्म भाइयां तै प्रेम करो। पणमेसर का आदर के गेल्या भय मान्नु। शासक का आदर करो।

### मसीह के दुःख का दृष्टांत

**18**हे सेवको, जिसा होणा चाहिये आदर के गेल्या अपने मालिकां के अधीन रहो। ना सिर्फ उनके, जो आच्छे सैं अर दुसरयां के खात्तर फ़िक्र करै सैं बल्के उनके भी जो करडे सैं। **19**क्यूँके जै कोए पणमेसर के बाबत चौकन्ना रहन्दे होए दुःख सहवै सै अर अन्याय झेल्लै सै तो ओ बड़ाई जोग्गा सै। **20**किन्तु जै भुण्डे काम्मां के कारण थारे तारीं छेल्या जावै सै अर थम उस तारीं सहो सो तो इसम्ह बड़ाई की कौण-सी बात सै। किन्तु जै थारे तारीं आच्छे काम्मां के खात्तर सताया जावै सै तो पणमेसर के श्यामी ओ बड़ाई के जोग्गा सै। **21**पणमेसर नै थारे तारीं इस करके बुलाया सै क्यूँके मसीह नै भी म्हारै खात्तर दुःख उठाये सैं अर इसा करके म्हारै खात्तर एक उदाहरण छोड्या सै, ताके हम भी उससे के चरण चिन्हां पै चाल सकां।

**22** “उसनै कोए पाप कोनी करया अर ना ए उसके मुँह म्ह कोए छळ की बात ए लिक्डी।”

यशायाह 53:9

**23**जिब उसकी बेजती करी गयी फेर उसनै किसे की बेजती

कोनी करी, जिब उसनै दुःख झेल्ले, उसनै किसे तारीं धमकी कोनी दी, बल्के उस साच्चे न्याय करण आळे पणमेसर के आगै अपने आप तारीं सौंप दिया। **24**उसनै क्रूस पै आपणी देही म्ह म्हारे पापां तारीं ओढ़ लिया। ताके अपने पापां के बाबत म्हारी मौत हो जावै अर जो कीमे नेक सै उसके खात्तर हम जीवां। यो उसके उन घावां के कारण ए होया जिनतै थम चंगे करे गये सो। **25**क्यूँके थम भेड्डां की तरियां भटकण लागरे थे किन्तु इब थम अपने पाळीयां अर थारी आत्मायां के रुखाळे के लवै बोहड़ आये सो।

### धणी अर बीरबान्नी

**3** इस्से ढाल हे बीरबान्नीयां, अपने-अपने धणीयां के अधीन रहो। ताके जै उनम्ह तै कोए पणमेसर के बचन का पालन ना करदे हों तो थारे पवित्र अर आदर तै भरे चाल-चलन नै देख के बिना किसे बातचीत के ए आपणी-आपणी बीरबान्नीयां के बिवार तै जीत लिये जावैं। **2**थारा साज-सिंगार दिखावटी नीं होणा चाहिये। **3**यानी के बाळां की वेणियाँ सजाण तै, सोन्ने की टुम पहरण तै अर आच्छे-आच्छे लत्यां तै करया जावै **4**बल्के थारा सिंगार तो थारे मन के भीतरले माणसपण तै होणा चाहिये, जो कोमल अर शान्त आत्मा के अमर सौन्दर्य तै भरपूर हो। पणमेसर की निंगाह म्ह जो कीमती हो।

**5**क्यूँके बीत्ते होड़ युग की उन पवित्र लुगाईयां का, अपने आप तारीं सजाण-सँवारण का योए ढंग था, जिनकी आस पणमेसर पै टिकरी सैं। वे अपने-अपने धणी के अधीन उससे तरियां ए रह्या करै थीं। **6**जिस तरियां तै अब्राहम के अधीन रहण आळी सारा जो उस तारीं आपणा स्वामी मानै थी। थम भी बिना कोए भय मान्ने जै नेक काम करो सो तो उससे की बेट्टी सो।

**7**इस्से तरियां ए हे धणीयो, थम आपणी बीरबान्नीयां के गेल्या समझदारी गेल रहो। उन तारीं कमजोर जाण के, उनका आदर करो। जीवन के बरदान म्ह उन तारीं आपणा गेल-उत्तराधिकारी भी मान्नु ताके थारी प्रार्थनाए म्ह आंट ना पडै।

### सत्कर्मा के खात्तर दुःख झेलणा

**8**अंत म्ह थम सारया तारीं समान बिचार, सहानुभूतिशील,

अपणे बन्धुआं तै प्रेम करण आळा, दयालु अर नम्र बनणा चहिए। **9** एक बुराई का बदला दूसरी बुराई तै मतना द्यो। अथवा बेजती कै बदलै बेजती मतना करो बल्के बदले म्ह आशीर्वाद द्यो क्युँके पणमेसर नै थारै ताहीं इसा ए करण नै बुलाया सै। इससे तै थारै ताहीं पणमेसर के आशीर्वाद का उत्तराधिकार मिलैगा। **10** शास्त्र कहवै सै:

“जो जीवन का आनन्द उठाणा चाहवै जो आच्छे बख्त ताहीं देखणा चाहवै उस ताहीं चहिये ओ कदे भी किते भुन्डे बोल ना बोल्लै। ओ अपणे होठां नै छळ की बाणी तै रोक्कै।

- 11** उसनै चहिये ओ मुँह फेरै उस तै जो नेक नीं होंदा ओ उन काम्मां नै सदा करै जो उत्तम सैं, उसनै चहिये ओ कोसिस म्ह लाग्या रहवै शान्ति पाण नै, उसनै चहिये ओ शान्ति का अनुसरण करै।
- 12** प्रभु की आँख टिकरी सैं, उन्ने पै जो उत्तम सैं प्रभु के कान लागरे सैं उनकी प्रार्थनायां पै जो भुण्डे कर्म करै सैं, प्रभु उन तै सदा मुँह फेरै सै।”

भजन संहिता 34:12-16

**13** जै जो उत्तम सै थम उस ताहीं ए करण नै लालायित रहवै तो भला थारै ताहीं कौण नुक्सान पयोचा सकै सै। **14** किन्तु जै थारै ताहीं भले कै खात्तर दुःख उठाणा ए पड़े तो थम धन्य सो। “इस करके उनकै किसे भी भय तै ना तो भयभीत हो अर ना ए डगमगाओ।” **15** अपणे मन म्ह मसीह ताहीं प्रभु कै रूप म्ह आदर द्यो। थम सारे जिस बिश्वास नै राक्खो सो, उसके बाबत म्ह जै कोए थारै तै बुझे तो उस ताहीं उत्तर देण कै खात्तर सारीहाण त्यार रहो। **16** किन्तु नरमाई अर आदर कै गेल्या ए इसा करो। आपणा हृदय शुद्ध राक्खो ताके यीशु मसीह म्ह थारै उत्तम आचरण की बुराई करण आळे लोग थारी बेजती करदे होए सरमावैं।

**17** जै पणमेसर की मर्जी याए सै के थम दुःख उठाओ तो उत्तम काम करदे होए दुःख झेल्लो, ना के भुण्डे काम करदे होए।

- 18** क्युँके मसीह नै भी म्हारे पापां कै खात्तर दुःख उठाया। यानिके ओ जो बेकसूर था, हम पापियाँ कै खात्तर एक

बर मर गया के म्हारे ताहीं पणमेसर कै लवै ले जावै। देही कै भाव तै तो ओ मारया गया पर आत्मा कै भाव तै जिन्दा करया गया।

**19** आत्मा की हालत म्ह ए उसनै जाकै उन सुर्गीय आत्मायाँ ताहीं जो कैदी थीं उन कैदी आत्मायाँ ताहीं संदेस दिया **20** जो उस बख्त पणमेसर की आज्ञा कोनी मानण आळी थी जिब नूह की किस्ती बणायी जाण लागरी थी अर पणमेसर धीरज कै गेल्या बाट देखण लागरया था, उस किस्ती म्ह थोड़े से यानि के आठ माणस ए पाणी तै बच पाये थे। **21** यो पाणी उस बपतिस्मा कै बरगा सै जिसतै इब थारा उद्धार होवै सै। इसम्ह देही का मैल छुड़ाणा कोनी, बल्के एक शुद्ध अन्तःकरण कै खात्तर पणमेसर तै बिनती सै। इब तो बपतिस्मा थारै ताहीं यीशु मसीह के पुनरुत्थान कै जरिये बचावै सै। **22** ओ सुर्ग म्ह पणमेसर कै सोळै कान्नी बिराजमान सै, अर इब सुर्दुत, अधीकारीगण अर सारी शक्तियाँ उसके अधीन कर दी गयी सै।

### बदला होया जीवन

**4** **1** जिब मसीह नै देही म्ह होकै दुःख उठाया तो थम भी उससे सोच नै हथियार कै रूप म्ह धारण करो क्युँके जो देहीं म्ह होकै दुःख उठावै सै, ओ पापां तै छुटकारा पा लेवै सै। **2** इस करके ओ फेर माणसां आळी इच्छायां का अनुसरण कोनी करै, बल्के पणमेसर की इच्छा कै मुताबिक कर्म करदे होए, अपणे बचे होइ भौतिक जीवन नै चढ़ा दे। **3** क्युँके थम इब लग अबोध माणसां की तरियां विषय-भोगां, वासनायाँ, दारूबाजी, उन्माद तै भरे मौज-मस्ती, दारू पीण आळे त्यौहारां अर नफरत तै भरी मूर्ति-पूजायां म्ह भतेरा टेम बिता चुके सो।

**4** इब जिब थम इस घृणित रहन-सहन म्ह उनका साथ कोनी देन्दे तो उन ताहीं अचम्भा होवै सै। वे थारी निन्दा करै सैं। **5** उन ताहीं जो इब्बे जिन्दे सैं या मर लिये सैं, अपणे बिचार का लेखा-जोक्खा उस मसीह ताहीं देणा होगा जो उनका न्याय करण आळा सै। **6** इस करके उन बिश्वासियाँ ताहीं जो मर लिये सैं, सुसमाचार का उपदेश दिया गया के देही रूप म्ह चाहे उनका न्याय मानवीय स्तर पै हो किन्तु आत्मिक रूप तै वे पणमेसर कै मुताबिक रहवैं।

### आच्छे इंतजाम करणीये बणो

7ओ बखत लवै सै जिब सब क्याहे का अंत हो जावैगा। इस करके समझदार बणो अर अपने पै काबू राखो ताके थारै ताहीं प्रार्थना करण म्ह मदद मिलै। 8अर सारया तै बड़ी बात या सै के एक दुसरे के बाबत लगातार प्रेम बणाए राखो क्यूँके प्रेम तै अणगणित पापां का निवारण होवै सै। 9बिना कीमे कहे सुणे एक दुसरे का स्वागत सत्कार करो। 10जिस किसे नै पणमेसर के ओड़ तै जो भी बरदान मिल्या सै, उसनै चाहिये के पणमेसर के कई ढाळ के अनुग्रह के उत्तम भण्डारी की तरियां, एक दुसरे की सेवा के खात्तर उसनै काम म्ह लाए। 11जो कोए उपदेश देवै ओ उससे तरियां करै, जिस तरियां मान्णो पणमेसर तै मिले बचनां नै ए सुनाण लागरया हो। जो कोए सेवा करै, ओ उस शक्ति के गेल्या करै, जिस ताहीं पणमेसर देवै सै ताके सारी बाततां म्ह यीशु मसीह के जरिये पणमेसर की महिमा हो। अर सामर्थ्य सदा सारिहाण उससे की सै। आमीन!

### मसीही के रूप म्ह दुःख उठाणा

12हे प्यारे ढब्बियो, थारै बिच्चाळै इस अग्नि-परीक्षा पै जो थारै ताहीं परखण नै सै, इस ताहीं अचरज मतना करना जिस तरियां थारै धारै कोए अनहोणी घटण लागरी हो, 13बल्के आनन्द मनाओ के थम मसीह की यातनाओं म्ह हिस्सा बटाण लागरे सो, ताके जिब उसकी महिमा प्रगट होवै जद थम भी आनन्दित अर मग्न हो सको। 14जै मसीह के नाम पै थारी बेजती होवै तो उस बेजती नै सहन करो क्यूँके थम मसीह के चेल्ले सो, थम धन्य सो क्यूँके पणमेसर की महिमा आळी आत्मा थारै म्ह बसै सै। 15इस करके थारै म्ह तै कोए भी एक खूनी, चोर, कुकर्मी या दुसरे के काम्मां म्ह आंट गेरणीया बणके दुःख ना उठावै। 16किन्तु जै ओ एक मसीही होण के नाते दुःख उठावै सै तो उसनै शर्मिन्दा कोनी होणा चाहिये, बल्के उसनै तो पणमेसर ताहीं महिमा देणी चाहिये के ओ इस नाम नै धारण करै सै। 17क्यूँके पणमेसर के अपने कुणबे तै ए सरू होके न्याय सरू करण का बखत आण पहोच्या सै। अर जै यो म्हारै तै ए सरू होवै सै तो जिनै पणमेसर के सुसमाचार का पालन कोनी करया सै, उनका नतीज्जा के लिक्डैगा?

18 “जै एक धार्मिक माणस का ए उद्धार पाणा ओक्खा

सै तो बिना पणमेसर के और पापियां के गेल्या के घटैगा।”

नीतिवचन 11:31

19तो फेर जो पणमेसर की मर्जी के मुताबिक दुःख उठावै सैं, उन ताहीं उत्तम काम करदे होए, उस बिश्वास तै भरे, सृष्टि के रचण आळे नै आपणी-आपणी आत्मायां ताहीं सौंप देणी चाहिये।

### पणमेसर के माणसां का टोळ

5 1इब मैं थारै बिच्चाळै जो बुजुर्ग सैं, उनतै निवेदन करूं सूं: मैं, जो खुद एक बुजुर्ग सूं अर मसीह नै जो दुःख झेल्ले सैं, उनका गवाह सूं तथा वा आण आळी महिमा जो प्रगट होण नै सै, उसका हिस्सेदार सूं। 2राह दिखाण आळे पणमेसर के माणसां का टोळ थारी देख-रेख म्ह सै अर निरीक्षक के रूप म्ह थम उसकी सेवा करो सो; किसे दबाव के कारण नीं, बल्के पणमेसर की मर्जी के मुताबिक इसा करण की खुद की मर्जी के कारण थम आपणा यो काम धन के लालच म्ह नीं बल्के सेवा करण के बाबत अपने तगाज्जे के कारण करो सो। 3देख-रेख के खात्तर जो थारै ताहीं सौंपे गये सैं, थम उनके करड़े दाब आळे शासक मतना बणो। बल्के लोग्गां के खात्तर एक आदर्श बणो। 4ताके जिब ओ प्रधान रुखाळा प्रगट होवै तो थारै ताहीं जीत का ओ भव्य मुकुट मिले जिसकी शोभा कदे भी घटदी कोनी सै।

5इस्से ढाळ हे गाबरूओ! थम अपने धर्म बुजुर्गां के अधीन रहो। थम एक दुसरे के बाबत नरमाई धारण करो, क्यूँके

“पणमेसर घमण्डीयां का बिरोध करै सै किन्तु दीन माणसां पै सारीहाण अनुग्रह रहवै सै।”

नीतिवचन 3:34

6इस करके पणमेसर के महिमावान हाथ के तळै अपने आप ताहीं नवाओ। ताके ओ सही मौक्का आण पै थारै ताहीं ऊँच्चा उठावै। 7थम आपणी सारी चिंतायां नै उस पै छोड़ दो क्यूँके ओ थारै खात्तर चिन्ता म्ह सै।

8अपणे पै काबू राखो। चौकन्ने रहो। थारा दुश्मन शैतान एक गरजदे सिंह के तरियां उरान-परान हांडदे होए इस टोह

